


O AUTORIMA



Prof. dr. sc. Miro Džakula

Rođen je 30. 7. 1960. godine u Čapljini, gdje je završio osnovnu školu, a potom Gimnaziju. Osnovne studije završio je na Ekonomskom fakultetu Sveučilišta u Mostaru. Na tom fakultetu završio je poslijediplomske i doktorske studije pod mentorstvom prof. dr. sc. Vinka Belaka.

Certificirani je računovođa, revizor i forenzički računovođa. U svom dugogodišnjem radnom iskustvu obavljao je poslove šefa robnog i materijalnog knjigovodstva u tvrtki “Lasta” Čapljina, šefa računovodstva u tvrtki “Bregava” Čapljina, inspektora u Općinskoj upravi društvenih prihoda, glavnog inspektora Općinskog vijeća u Čapljini, glavnog federalnog inspektora u Kantonalno-Županijskom poreznom uredu u Mostaru i vršitelja dužnosti rukovoditelja Kantonalno-Županijskog poreznog ureda u Mostaru. Od 1. 1. 2005. godine učestvuje u izradi zakona, pravilnika, instrukcija i drugih zakonskih i podzakonskih akata iz oblasti neizravnog oporezivanja, te implementiranju PDV-a u Bosni i Hercegovini, a od 2006. obavljao je poslove šefa Odsjeka za poreze u Regionalnom centru Uprave za indirektno/neizravno oporezivanje u Mostaru. Od 2011. godine je vršitelj dužnosti i direktor Uprave za indirektno/neizravno oporezivanje. Na Ekonomskom fakultetu Sveučilišta u Mostaru je izvanredni profesor, zadužen za nastavu u predmetima Analiza finansijskih izvještaja i Oporezivanje poduzeća. Autor je i koautor više knjiga, stručnih i znanstvenih radova objavljenih u zemlji i inozemstvu. Bio je organizator, učesnik i predavač na mnogim simpozijumima i seminarima iz područja zanimanja. Oženjen je i otac četvero djece.



dr. sc. Milica Vidović

Rođena je 1. 9. 1985. godine u Trebinju, gdje je završila osnovnu školu, a potom Gimnaziju. Osnovne studije završila je na Ekonomskom fakultetu Univerziteta u Banjoj Luci – smjer Računovodstvo, revizija i finansijsko upravljanje. Na tom fakultetu završila je poslijediplomske i doktorske studije. Tako je 28. 4. 2015. godine odbranila magistarski rad na temu „Međuslovljenost politike oporezivanja i razvoja malih i srednjih entiteta“ i stekla zvanje magistra ekonomskih nauka, a 28. 9. 2022. odbranila doktorsku disertaciju pod nazivom „Modeliranje politika oporezivanja malih i srednjih preduzeća u Bosni i Hercegovini u funkciji privlačenja direktnih stranih investicija“ i stekla zvanje doktora ekonomskih nauka. Sertifikovani je forenzički računovođa i sudski vještak za ekonomsku oblast. U Upravi za indirektno oporezivanje zaposlena je od 1. 9. 2009. godine, gdje i danas radi na različitim radnim mjestima. Trenutno je raspoređena na radnome mjestu šefa Odsjeka za obradu poreskih prijava u Sektoru za poreze u Glavnoj kancelariji Uprave za indirektno oporezivanje. Od zasnivanja radnog odnosa učestvovala je na mnogobrojnim radionicama i seminarima iz oblasti provođenja poreskih propisa u zemlji i inostranstvu, kao učesnik i kao predavač, kao i u studijskim posjetama poreskim upravama i ministarstvima finansija različitih zemalja. U Upravi za indirektno/neizravno oporezivanje učestvovala je u realizaciji brojnih projekata, od kojih se ističu: izrada Plana integriteta Uprave za indirektno/neizravno oporezivanje, uvođenje ISO standarda u poslovne procese Uprave i implementacija novog poreskog informacionog sistema. Bila je rukovodilac Tima za izradu normativnih akata, uvođenje elektronske komunikacije u Upravi za indirektno/neizravno oporezivanje i prelazak na elektronsko podnošenje PDV-a i akciznih prijava. U Upravi za indirektno/neizravno oporezivanje imenovana je za člana radne grupe za izradu Zakona o postupku indirektnog oporezivanja, Zakona o PDV-u i Pravilnika o primjeni Zakona o PDV-u. Redovno objavljuje naučne i stručne radove na temu poreske politike, oporezivanja privrednih društava, te primjene poreskih propisa u Bosni i Hercegovini. Na Visokoj školi za finansije i računovodstvo FINra u Tuzli angažovana je kao profesor zadužen za nastavu na predmetu Upravljanje troškovima i kalkulacije i kao predavač na predmetu Forenzičko računovodstvo i računovodstvene prevare. Udata je i majka jednog djeteta.



Sedin Mešinović, dipl. iur.

Rođen je 16. 8. 1985. godine u Tešnju. U rodnom gradu završio je 2000. godine osnovnu i 2004. srednju školu. Osnovne studije završio je na Pravnom fakultetu Univerziteta u Tuzli 2. 7. 2008. godine. Nakon okončanja studija bio je zaposlenik ASA osiguranja d. d. Sarajevo. Od 5. 1. 2009. zaposlen je u Upravi za indirektno oporezivanje (UIO) – Sektor za poreze na različitim radnim pozicijama, od kojih se izdvajaju: inspektor u Grupi za kontrolu velikih poreskih obveznika Banja Luka, saradnik u Odsjeku za kontrolu velikih poreznih obveznika u Sektoru za poreze u Središnjem uredu Uprave za indirektno/neizravno oporezivanje, inspektor u Grupi za kontrolu velikih poreznih obveznika Tuzla, šef Grupe za reviziju i kontrolu pri Odsjeku za poreze Regionalnog centra Tuzla, šef Odsjeka za reviziju i kontrolu u Sektoru za poreze u Središnjem uredu UIO, v. d. pomoćnika direktora za Sektor za poreze. U međuvremenu, 13. 11. 2013. godine okončao je polaganje pravosudnog ispita pred ispitnom komisijom imenovanom od Ministarstva pravde Bosne i Hercegovine, a tokom 2018. stekao i zvanje certifikovanog forenzičkog računovođe. Aktivno govori i služi se engleskim jezikom. Učesnik je velikog broja seminara, radionica i obuka iz oblasti provođenja poreznih propisa u zemlji i inostranstvu, kao sudionik i kao predavač. Oženjen je i otac dvoje djece.



Vinko Skoko, mag. iur.

Rođen je 5. 3. 1988. godine u Mostaru, nastanjen u Ljubuškom, gdje je završio osnovnu školu, a potom i Gimnaziju. Osnovne studije je završio na Pravnom fakultetu Sveučilišta u Mostaru 4. 4. 2012. godine s kvalifikacijom i titulom magistar prava. U Upravi za indirektno/neizravno oporezivanje radi od 2014. godine, i to u Sektoru za poreze na različitim radnim mjestima od kojih se posebno izdvaja obavljanje dužnosti inspektora u Grupi za kontrolu velikih poreznih obveznika u Regionalnom centru Tuzla. Trenutačno u Upravi za indirektno/neizravno oporezivanje obnaša funkciju šefa Odsjeka za kontrolu velikih poreznih obveznika u Sektoru za poreze u Središnjem uredu, a 2018. godine je stekao zvanje certifikovani forenzični računovođa.

U svome dosadašnjem radu bio je aktivni član raznih radionica i seminara iz oblasti poreza na dodatu vrijednost. Sudjelovao je u mnogim studijskim posjetama poreznim administracijama te ministarstvima financija raznih zemalja. Oženjen je i otac dvoje djece.